

ratur; et sic requiritur veritas per quam dictum rei adequatur, alias dictum non esset confirmatione dignum. Aliud requiritur ex parte causae pro qua juratur; et sic requiritur iustitia, alias non esset debita necessitas. Tertium requiritur ex parte jurantis; et sic requiritur ut cum discretione juret, alias non adhiberetur debita cautela; et sic est iudicium.

Ad primum ergo dicendum, quod veritas non accipitur hic secundum quod est pars iustitiae, sed secundum quod est adequatio vocis ad rem.

Ad secundum dicendum, quod iudicium non accipitur hic quod est unius in ordine ad alterum, quod est executio iustitiae; sed quod est alicuius ad seipsum in hoc quod discit quid facere debeat, et quid accidere possit.

Et per hoc patet solutio ad tertium.

Ad quartum dicendum, quod in iudicio, quod est discretio jurantis, includitur debita forma et eventus et tempus et omnia quae ex parte jurantis consideranda occurrunt.

Ad quintum dicendum, quod propter periculum quod in iuramento imminet, praeter aliis nostris actibus, praecipue iuramento isti comites adhibentur.

ARTICULUS III.

Utrum iuramentum incautum sit obligatorium.
(2-2, qu. 89, art. 7.)

Ad tertium sic proceditur. 1. Videtur quod iuramentum incautum sit obligatorium. Iuramentum enim incautum dicitur quod vergit in exitum malum vel minus bonum. Sed tale fuit iuramentum quod Josue Gabaonitis exhibuit (Josue 9), quod contra praecipuum Dei fuit, quo praeeperat ne cum Gentibus foedus inirent; et tamen observavit illud iuramentum, reputans se obligatum. Ergo iuramentum incautum est obligatorium.

2. Praeterea, esto quod aliquis juret nunquam se intraturum religionem: illud iuramentum incautum reputatur; et tamen videtur quod sit obligatorium, quia sine peccato potest religionem non ingredi: si autem intret, perjurium incurrit. Quilibet autem obligatur ad hoc ut bonum illud dimittat quod sine peccato fieri non potest. Ergo iuramentum incautum videtur obligatorium.

3. Praeterea, si aliquis juret se nunquam praelationem recipere, hoc iuramentum similiter reputatur incautum, eo quod impeditur utilitas communis; et tamen, ut videtur, obligat ad sui observationem: quia si etiam non jurasset, laudabile est ut praelationem quis fugiat. Ergo iuramentum incautum est obligatorium.

Sed contra, sicut Bernardus dicit (de Praecepto et Dispensatione, in princ.), quod pro caritate institutum est, contra caritatem non militat. Sed iuramentum pro caritate institutum est. Cum ergo per iuramentum incautum caritas impugnetur, quia est de aliquo malo faciendum, vel de aliquo bono omitendo, videtur quod tale iuramentum non sit obligatorium.

Praeterea, nihil attingit propriam virtutem nisi quando perfectum est, ut dicitur 7 Phys. (text. 18). Sed virtus iuramenti est obligare. Cum ergo iuramentum perficiatur tribus comitibus, videtur quod iuramentum, ubi tres comites non occurrunt, non sit obligatorium. Sed in omni iuramento incauto deest iustitia, si illicitum sit quod juratur, vel iudicium, si per hoc aliquid bonum impediatur.

Ergo iuramentum incautum non est obligatorium.

QUAESTIUNCULA II.

Uterius. 1. Videtur quod iuramentum coactum non sit obligatorium. Nullus enim potest ad aliquid speciale obligari, nisi seipsum obliget. Sed nullus dicitur aliquid facere nisi quod volens facit. Cum ergo iuramentum coactum voluntate jurantis excludat, videtur quod tale iuramentum non sit obligatorium.

2. Praeterea, major est obligatio matrimonii quam iuramenti: quia si aliquis juravit se nunquam matrimonium initutum, et postea matrimonium consummaverit, tenetur in matrimonio perseverare. Sed coactio contractum impedit matrimonium. Ergo etiam impedit obligationem iuramenti.

3. Praeterea, iuramentum non obligat nisi in hac necessitate ut peccatum evitetur. Sed coactio excludit reatum peccati; unde Lucia dicit: *Si invitum me violare feceris, castitas mihi duplicabitur ad coronam*. Ergo etiam obligationem iuramenti tollit.

Sed contra est auctoritas Augustini, qui respondit ex consilio B. Ambrosii euidam, qui coactus juraverat quandam ducere uxorem, quod matrimonium teneret (1). Ergo videtur quod coactum iuramentum sit obligatorium.

Praeterea, iuramentum cui non deest aliquis suorum comitum, est obligatorium. Sed coactio non tollit aliquem comitem iuramenti. Ergo non aufert obligationem a iuramento.

QUAESTIUNCULA III.

Uterius. 1. Videtur quod iuramentum non obliget secundum intentionem recipientis. Nullus enim debet ad ignotum obligari. Sed intentio iuramenti recipientis est mihi ignota. Ergo iuramentum meum non obligat me secundum intentionem illius.

2. Praeterea, iuramentum exhibetur ad confirmationem sermonis jurantis. Sed intentio jurantis propinquior est sermone suo quam intentio alterius. Ergo magis obligat secundum intentionem jurantis quam recipientis.

3. Praeterea, ad obligationem iuramenti voluntas jurantis requiritur, qui seipsum obligat. Sed si desit ei intentio obligandi se secundum intentionem recipientis, non est ibi voluntas obligationis. Ergo iuramentum illud non erit obligatorium secundum intentionem recipientis.

Sed contra, iuramentum institutum est ut per ipsum fiat fides de sermonibus jurantis recipientis. Sed hoc non esset nisi secundum suum intellectum iuramentum accipiendum esset. Ergo iuramentum obligat secundum intentionem recipientis.

Praeterea, fraus et dolus nemini debet patrocinari. Hoc autem acciderit, si aliquis dolose iurans secundum suam intentionem tantum obligaretur. Ergo obligatur secundum intentionem recipientis.

Solutio I. Respondeo dicendum ad primam quaestionem, quod duplex est iuramentum: unum assertorium, et aliud promissorium. Promissorium iuramentum est de eo quod in futurum a jurante faciendum expectatur vel per se vel per alium. Assertorium vero est quod fit ad confirmationem

(1) Ex videre est in Decretis, caus. 22, cap. *Inter cetera* (Ex edit. P. Nicolai).

veritatis et praesentis et praeteritae, si etiam causa non simus. In iuramento ergo assertorio est una tantum obligatio, scilicet qua quis obligatur ad peccatum, si veritas suo iuramento desit. In iuramento autem promissorio est duplex obligatio. Una qua quis obligatur ad faciendum hoc quod iuramento promisit; alia qua obligatur ad peccatum, si non fecerit. His ergo visis, sciendum, quod sicut non omnis assertio est digna ut iuramento firmetur, ita nec omnis promissio, sed illa tantum quae utilitatem aliquam continet: unde si promissio quae est de aliquo quod salutem impediatur, sive sit contrarium saluti, sive viae perfectae in salutem, iuramento firmetur, ex hoc ipso iuramentum efficitur indebitum, quasi actus cadens super indebitam materiam: unde obligat secunda obligatione quae est ad peccatum, nec remanet ei virtus obligandi prima obligatione ad faciendum. Prima enim obligatio est ad vitandum secundam obligationem: unde iuramentum quod de necessitate ad peccatum obligat, ipso facto ab alia obligatione vacuatur.

Ad primum ergo dicendum, quod iuramentum Josue non erat de eo quod secundum se esset illicitum, sed de eo quod factum erat illicitum, quia prohibuit: unde in hoc sufficiebat intentionem servare prohibentis. Et ideo, ut dicit Ambrosius in lib. de Offic. (5, cap. 9), muletavit eos meliori morte, scilicet obsequio mysterii divini, ut esset clementior sententia: et sic quodammodo occisi sunt servilitate, quae est mors interpretativa secundum leges.

Ad secundum dicendum, quod ipso facto quod quis jurat se religionem non intraturum, perjurus est. Quamvis enim liceat sibi religionem non intrare, non tamen licet obicem Spiritui sancto ponere; et ideo non oportet ut ad eundem crimen perjurii, quod jam vitari non potest, religionis ingressum omittat.

Ad tertium dicendum, quod quamvis praelationem fugere possit quandoque ex bono procedere, tamen pertinaciter resistere, semper malum est, sicut patet in Glossa Gregorii (1) Hierem. 1 qui hoc probat exemplo Hieremiae et Moysi, qui cum primo recusassent praelationis officium, ad ultimum humiliter obediunt. Unde huiusmodi iuramentum incautum reputatur: quia, quantum in se est, providentiae divinae praedictat, et obedientiam ad superiores excludit, quibus in hoc obedire tenetur.

Solutio II. Ad secundam quaestionem dicendum, quod coactio in iuramento assertorio non potest esse sufficiens, quia nihil potest sufficienter cogere ad hoc quod homo mortaliter peccet; quod contingit, si falsum cum iuramento asserat; unde tale iuramentum quantumcumque coactum, est obligatorium ad peccatum. In iuramento autem promissorio sciendum, quod coactio potest esse sufficienter cogens ad promittendum: quia ut majus periculum evitetur, potest aliquis aliquid promittere sibi damnosum; quod sine peccato contingere potest: et tunc talis coactio, si sit sufficiens quae in constantem virum cadere possit, tollit obligationem iuramenti in foro contentioso: quia ei qui vim intulit, non competit actio ex obligatione illius iuramenti. Sed in foro conscientiae est obligatorium: quia magis debet homo subire temporale damnum quam

(1) Ex ejus libro de Pastoralis cura, part. 1, cap. 7, ubi plenius ea de re, ut in Glossa (Ex edit. P. Nicolai).

fidem frangere. Habet tamen remedium ut in iudicio ab eo repetat. Quod si juraverit se non repetiturum, potest iudici denunciare, qui ex officio suo debet raptorem ad restituendum cogere. Si autem juraverit se non denunciaturum, contra corruptionem fraternam juravit, et non tenetur observare.

Ad primum ergo dicendum, quod coactio non potest facere in tali casu violentum absolute, sed violentum mixtum: quia oportet ut qui jurat, membra moveat ad loquendum, et sua voluntate: tale autem violentum, ut dicit Philosophus in 5 Ethic. (cap. 1), quamvis simpliciter sit involuntarium, tamen hic et nunc est voluntarium: quia ad vitandum majus malum vult minus damnum subire.

Ad secundum dicendum, quod coactio tollit obligationem matrimonii, quia non solum requirit consensum, sed etiam consensum liberum: quod non est in obligatione iuramenti.

Ad tertium dicendum, quod Lucia loquitur de violento simpliciter, in quo patiens nihil confert agenti. Tale autem violentum non potest esse in tali casu.

Solutio III. Ad tertiam quaestionem dicendum, quod iuramentum promissorium, ut dictum est, obligat hac necessitate ut culpa evitetur: unde obligat ad omne illud faciendum quo non facta culpa incurritur. Distinguendum est ergo in eo qui jurat: aut enim simpliciter, aut dolose jurat. Si jurat dolose, ex duabus partibus potest culpa sequi: scilicet ex fractione iuramenti, et ex dolo. Quamvis ergo ex ipsa ratione iuramenti, inquantum iuramentum, non obligatur ad servandum ipsum nisi secundum suam intentionem; tamen ex necessitate iuramenti, inquantum fuit dolosum, obligatur ad observandum taliter quod ex dolo alius non laedatur: et hoc est quando secundum intentionem recipientis implet iuramentum. Si autem simpliciter juret absque dolo, tunc in foro conscientiae non obligatur nisi secundum suam intentionem; sed in foro contentioso, ubi intentio ignoratur, obligatur secundum quod verba communiter accipi solent.

Et per hoc patet solutio ad obiecta.

ARTICULUS IV.

Utrum perjurium sit mendacium iuramento firmatum.
(2-2, quaest. 98, art. 1.)

Ad quartum sic proceditur. 1. Videtur quod perjurium non sit mendacium iuramento firmatum. Omne enim mendacium est falsa vocis significatio, ut in praecedenti dist. dictum est. Sed perjurium potest esse sine falsa vocis significatione: quia, sicut in littera dicitur, qui jurat verum quod putat esse falsum, perjurus est. Ergo non omne perjurium est mendacium iuramento confirmatum.

2. Praeterea, perjurium quandoque incurritur in iuramentis quae de futuris contingentibus fiunt. Sed in futuris contingentibus non est veritas vel falsitas determinata, ut probat Philosophus (1 Perier., cap. 6); et sic perjurium potest esse sine falsa vocis significatione, et sine mendacio.

3. Praeterea, in littera dicitur, quod qui falsum jurat, quod credit esse verum, perjurus est. Sed talis non mentitur. Ergo perjurium potest esse sine mendacio.

